

四庫全書

集部

欽定四庫全書

集部

文苑英華卷五百七十二

五至

詳校官給事中_臣李臺

助教_臣常循覆勘

總校官進士_臣朱鈐

校對官中書_臣胡紹基

謄錄監生_臣陳振興

欽定四庫全書

文苑英華卷五百七十二

宋

李昉等

編

宰相讓官一

為魏王讓知政事第二表一首

為王及善讓內史第二表一首

為王方慶讓鳳閣侍郎表二首

為楊執柔讓同鳳閣鸞臺平章事表一首

讓知政事表一首

讓同平章事表一首

讓鸞臺侍郎表一首

為張令讓麟臺監封國公表一首

代家君讓左僕射表一首

代家君讓侍中表一首

為王尚書讓宰相表一首

為李尚書讓兼左僕射表二首

為韋相公讓幽公表一首

為魏王讓知政事第二表 李 嶠

臣某言臣由衷之辭已具前表分外之澤仍叨後恩祇命低徊不知所處臣某誠惶誠恐頓首頓首死罪死罪臣九能無術五伎不成空荷陶甄竟微知效陛下篤猶子之愛用家人之慈流其渥恩被以簪組析珪分器等姬氏之藩維裂壤誓河承漢家之禮秩皇儀曉列拜金扆而升玉墀仙蹕晨遊陪栢梁而侍蒿柱在臣榮幸實冠等夷惟臣妄庸已成忝越豈可以仍祇大命更竊厚

恩任濟時之股肱為巨川之舟楫且臣屬居宗室地接
葭莩惟社稷之安危乃門庭之休戚豈不願磨頂至踵
禪高益深徒以智力有涯勉強無地懼傾軫之為敗憂
折鼎之生災匪藏器而謀身實輸誠而體國伏乞俯矜
愚劣永鑒隆替思懋賞懋官之義用知臣知子之心特
停過恩速寢嚴命則物情輿議咸仰於至公叨榮謬官
不塵於則哲無任慙懼屏營之至謹詣閣奉表以聞

為王及善讓內史第二表

臣及善言臣叨荷殊私冒陳至懇而惕慮昏於凡識深
誠蔽於短辭丹槩罔遁紫泥徒渥祇奉還答周惶失措
臣中謝臣才疎行缺運偶時來榮匪德遷官由恩達法
河象岳升臺歷府行參八命坐陟九霄彤軒阜駟非振
鷺之飾青組丹紱是濡鵜之譏施重丘山効微涓滴妨
賢自久速謗滋深頃因齒髮之衰得蒙骸骨之賜西河
退老非翫經書東海歸閒空求藥餌方養支離之疾翻
成愷悌之恩曲降絲綸重收簪屨一作履徵榮槁木責焰

寒灰將使策蹇磨鉛入總樞秘牽羸引僊叅典鈞石仰
抃恩渥顧探心守桑榆且晏蒲柳先秋方與絳縣老人
論其甲子淄川艾耄比其容貌將何以對敬全扈趨奉
玉墀當鳳沼之便蕃望龍闈之清切况寅亮皇極經綸
帝道功叅濟巨義等作霖隆替是因具瞻斯在永言授
受豈當容易是用深鑒陳力載懷天休心憂折鼎乞保
懸車且今百度惟貞九流式序鵷鴻齊列俊人在官可
使畫虎

唐詩
作武

承羞豐貂竊幸謬中孚之好爵辱大雅之

能官伏願深惟至公俯收曲澤矜此疲劣改命才賢則
器滿之凶不累於愚叟棟隆之吉永光於聖代無任慙
懼屏營之至謹重詣朝堂奉表以聞

為王方慶讓鳳閣侍郎表

臣某言伏奉恩制以臣為鳳閣侍郎同鳳閣鸞臺平章
事恩寵光臨獎飾踰分虔荷明命營魂失守臣某中謝
臣學非儒墨術異商韓文乏斧藻藝慙刀筆屬乾坤貞
觀日月光暉飛龍在天而庶物咸覩仙兔離畢而羣萌

皆潤遂得封植樗散謬齒於翹薪剪拂駕駘濫陪於逸
驥驟荷私遇頻階榮擢入叅丹閣出擁彤騶爰自海邦
遂升河輦佩若若之綬駕轉轉之轂叨恩竊幸空變星
霜尸祿妨官曾微報効宜受素飡之責翻成黃閣之榮
夕拜瑣闥朝陪禁省敢希任先淑睿之美每憂王歆謬
誤之失而天慈逾渥聖澤無涯爰迴斗極之暉更寵掖
垣之授下神畿而入仙禁未變葭灰自鸞渚而遊鳳池
僅彫莫葉苟侯之十旬累命未可為侍車公之一日九

遷曾無足比既超倫而邁等實負愧而承羞臣亦何人
敢叨非據况樞秘之重絲綸是職言叅玄化步入紫微
臣蒲柳既秋桑榆漸迫耄期云及衰疾徂侵以日朕之
歌當夜行之罪招愆獲謗非為身謀敗駕傾餽將貽國
負蓋力周於用則輕重咸宜任一作用過其常知鉅細同
躡伏願察臣知止之分矜臣自量之情闕 迴三

舍之光油然作雲垂九霄之澤曲收過謬改命才賢則
維鵜之譏不起於輿誦振鷺之詠復聞於朝序無任悚

懼之至謹詣朝堂奉表以聞所讓人別狀封進臣某誠
惶誠恐頓首頓首死罪死罪謹言

第二表

臣某言臣由衷之祈已具前奏而不次之澤仍垂後恩
俯仰慙懼莫知啓處臣某誠惶誠恐頓首頓首死罪死
罪臣爰從壯齒不逮儕流況在耄期曾何志力嗟負鼎
之無術患挈瓶而屢空徒以慶雲垂津枯槁蒙澤杲日
流煦嚴一作霜不凋貪及聖明之辰願從簪履之列僣

俛榮祿推遷歲時豈忘陳力之言方致乞骸之請不謂
聖慈迴睠天造曲成東膠尚賢未始澄汰西伯養老更
垂優渥拔跡鷩萍之曹假寵神仙之署二離齊景八舍
連芳歟段涉千里之途輪囷為萬乘之器龍池沐髮始
暢前榮鳳沼躍鱗旋叨後命顧茲疲朽理絕琢磨在方
圓而罕施顧長短而無取豈可以仍塵帝載累紊國經
使身貽鼎覆之憂朝失棟隆之舉是用內慙外懼夕惕
晨興輕薦本誠敢謝非飾伏乞矜臣難奪之志體臣不

移之愚特停過恩改命賢哲則濟濟之詠復聞於聖朝
洋洋之美不專於曩載無任慚懼之至謹重詣朝堂奉
表以聞

為楊執柔讓同鳳閣鸞臺平章事表

前人

臣某言伏奉恩制命臣同鳳閣鸞臺平章事受命祇懼
俄驚魂爽臣執柔誠惶誠恐頓首頓首死罪死罪臣聞
任官擇人哲王之所不易陳力審分忠臣之所宜守固

當使寵私路絕公直道行然後能謗譖不興緝熙有寄
臣材非上達地則外姻攀日月之末光承雨露之餘渥
遂得持衡天闕攝職斗樞塵八座之政本忝三軍之戎
務高秩厚位徒辱於庸虛弱霧輕埃竟微於答劾盤桓
寵祿僂俛歲時甘受維鵜之刺寧懷振鷺之舉而聖慈
無已天造彌隆復使叅掌國鈞預聞執政撫已慙悸捫
心震越夫以衡石萬幾鹽梅三鉉叅翕闕疑作闕之立造
輔丹青之景化自非媵莘占渭出昴乘箕安可寅亮帝

圖弼諧邦教臣之蒙蔽久塵聽覽豈足以傍允物情上
迴天鑒承舟楫之遠託當股肱之重寄伏願暫停疏纘
俯擇芻蕘搜訪才良用平分之道屏絕私昵收曲成之
惠則域中多幸天下至公豈惟匪服免譏臣無器滿之
懼固亦得賢斯在朝有棟隆之吉無任慙悚之至謹詣
朝堂奉表以聞

讓知政事表

臣某言伏奉恩旨令臣同鳳閣鸞臺平章事有命自天

光寵踰量如集于木啓處失圖臣嶠誠惶誠恐頓首頓
首死罪死罪臣聞簡賢任能百揆所以時叙謬官失職
九流於是咸曠隆替所寄義不可輕臣才實凡庸志無
遠大叨預簪履遂升臺閣踐金門而遊石室掌狐史而
參鳳綸被蜉蝣之衣徒竊榮寵接鴛鴦之羽久慙尸曠
甘受妨賢之責忽承非次之恩仍使叅預機衡獻替帷
幄持濟巨之舟楫味和羹之醯醢以挈瓶之智陪負鼎
之遊將何以祗奉帝難弼亮皇極況丹青所運鼓舞通

於四時鑪錘所裁網紀行於萬俗動關政體豈易其人
臣才闕行疎藝殫術淺同子房之多病異吳漢之強力
策支離之杖未振其軀資擁腫之材豈勝其任將恐貽
災傾餽取辱敗軍喪實虧名夫豈足惜害公撓法茲焉
是懼敢緣陳力之義輕布由衷之請伏冀九霄垂澤三
舍迴光體臣不移之愚矜臣難奪之志特停過謬改命
才賢則器滿之凶不累於凡鄙棟隆之吉永光於聖代
無任慙懼屏營之至謹詣朝堂奉表陳讓以聞

讓同平章事表

闕名

臣某言高品吳千金至奉制加臣銀青光祿大夫同中書門下平章事兼泗濠等州節度觀察處置等使餘如故者初受恩榮若登霄漢退思塵忝如履春冰臣中謝臣聞以德詔官以勞定賞苟或虛授人無勸心臣自守方隅累更時歲荷唐虞宣力之寄乏齊魯振政之能愧無可稱以答高位豈意聖慈弘獎天澤荐加以燮贊之崇名被庸虛之陋質懼速官謗有玷大猷伏以宰相之

職安危是主其在當否繫于慘舒唯以材升例無平進

舉不失德則副蒼生之心苟非其人或致夷戎

一作外夷

西臣雖愚昧嘗覽前言豈敢冒榮遂安竊位輒思事理

冀盡芻蕘若以汴河要津漕運所切徐方倣擾師旅未

寧謹當上稟睿謀下貞戎律尅期而進屈指可平勵衆

之先是臣之志既行其事必在正名所加節制安敢飾

讓至於銀青貴服金鉉重名勲績無聞豈宜濫及伏乞

賜寢前命俯亮愚衷微臣有遂心之宜聖朝無不稱之

服名器斯慎退讓有聞遐邇聆風孰不知勸其新授官
告謹重封進無任屏營之至

讓鸞臺侍郎表

前人

臣某言伏奉恩制以臣為鸞臺侍郎依舊同鸞臺鳳閣
平章事兼修國史仰祇聖澤退怯愚衷周章失圖怵惕
惟厲臣某誠惶誠恐頓首頓首死罪死罪臣聞疇德而
授則尸曠之譏絕推恩而舉則緝熙之道廢臣志狹量
淺業空理疎揆才異言行之科入仕非庶高之選邀屬

時幸累叨榮級石渠麟閣司典籍之林金門鳳池叅廟堂之議以小才而居大任用近智而恢遠畧緣鶴之鼎既失於鹽梅濡鵜之衣實慙於紱冕甘待素餐之責忽承非次之恩夫以瑣闥崇嚴玉堂祕近職叅持蓋位亞掌壺子雲以善屬文詞始應夕拜李真以妙通經術方陪旦講臣之愚陋實畏友朋豈足以奉帷幄之昌言聯名賢之逸軌且短才不齒未減雙鳧之數豐秩妄加必喪羣龍之績陛下經緯品物搜揚管庫方使道風德範

遠出帝先豈令敗政妨官近自臣始伏願俯收人望顧
惜朝班特迴寵光改命賢俊則百僚寅亮長無鼎覆之
憂三階底平自有棟隆之吉無任悚戴屏營之至謹詣
朝堂奉表陳請以聞其所讓人具如別狀臣某誠惶誠
恐頓首頓首死罪死罪謹言

為張令讓麟臺監封國公表 前人

臣某言臣短辭易窮愚意難達雖由衷之訴累黷於清
規而臨下之明未照於丹慙伏奉還旨更優前命心魂

交悻啓處失圖臣某誠惶誠恐頓首頓首死罪死罪竊
惟服勤致用事主之名節推誠納忠為臣之職分凡列
衣冠之序忝升教義之筵立身揚名孰不由此況臣沐
浴盛化被服隆恩陪萬乘之旌旃列四臣之禦侮犬馬
立効雖未堪申防代勞鷹鷂有情豈敢忘除凶弭慝論
削蒲之釁逆舉觸瑟之袂變蓋惟恒事豈足言功陛下
錄臣謏才收臣薄藝以某纓組舊業頗聞於義方山林
遠情粗閑於道術訪其隱仙之訣求其詩禮之對不行

而至坐辭麋鹿之羣無翼而飛遂接鴛鴻之侶久慙粉
米之飾欲辭稻粱之惠日來月往猶戀於軒墀雨施雲
行亟迴於印綬今復更申殊獎追叙微庸以臣子之恒
情辱公卿之顯位等威齊乎四履名器光於五臺縟禮
崇徽頓榮於非據深憂巨惕更切於如臨夫不失賞刑
先王所以撫中外大明黜陟前典所以正邦家中麋豹
之侯僅堪封爵乏羔羊之節無階流品乃賢哲之所慎
豈庸微之敢安是用仰辭渥恩俯誓肌骨寧甘於犯違

朝憲不可以虧損帝難固守不移之愚庶全難奪之志
伏冀南離迴耀微察於傾心北斗垂芒稍矜於走魄特
停過謬曲賜優容使官謗不喧工歌有序則無私之覆
彌大於九玄至公之途永隆於萬國無任忝竊慙懼屏
營之至謹重詣朝堂奉表固請以聞

代家君讓左僕射表

蘇頌

臣某言伏奉制書以臣為尚書左僕射餘如故祗陳惶
悸罔知攸處臣中謝臣始孩而孤不承義方之訓及壯

思勉又乏殊異之才幸以高曾緒業妄膺俊造州郡徒
勞豈議聞達陛下昔居邸第臣得謬連牧馬曳裾之末
忽焉三載遺簪之舊親奉六飛攀鱗而踐臺閣無翼而
登霄漢皆聖主造物之恩成小臣飾躬之漸雖出入升
降數十年間紆青拖紫復何功業大行皇帝不以非才
擢登近侍貂蟬始拜居守三秦輿駕來旋俯移數月以
臣愚直不任政事猶假位選曹留臺洛邑去歲秋暮復
叨端揆臣往以謀猷缺如尋而年病相迫每經陳乞未

賜哀矜屬升遐之際變起倉卒受遺顧托形於制旨臣雖獨拒邪謀莫能死全忠烈則臣之為咎已無所逃豈謂卑聽廼誠曲蒙照獎非臣微命能答鴻鈞自光華在辰睿聖登極四罪皆服百工咸事尚書萬幾之會僕射庶寮之長正宜明德茂才彌綸經濟豈使妨賢敗政自左而右陛下以維新之業始邀於卜夢而念舊之私尚任於疲老臣知不可議者伊何安敢上累明時下塵良史伏乞憫臣有涯之忝越然後選衆而舉得人為盛非

唯微物覽分固亦朝廷益光無任慙荷屏營之至謹奉
表陳讓以聞臣所讓人別狀封進

代家君讓侍中表

前人

臣某言伏奉制書以臣守侍中散官勲封如故仍西京
留守恩降霄極澤深雲露內省諸已不知所裁臣中謝
臣實小人偶識常分志學頗慚於先構致身匪期於遠
達將五十年自微而著蓋妄庸者何幸而升頃主禁令
於管轄臣歷踐而不能肅事訓黎人以五教臣謬遷而

不能揚職公私愧覲夙夜憂惶豈悟微物更蒙殊造臣
中謝且常伯納言其來自古切問近對孰密於茲王命
惟允宰臣之任政刑所繫理亂攸在臣恭聞典謨遠觀
載籍得其人則有鹽梅之寄矣失其人則有鐘鼓之妖
矣況臣淺陋加以衰疾便欲左蟬右貂負璽陪乘頡頏
清禁光耀紫極臣知不可何止流議遂使臣比肩風力
接武元凱正恐國家疑事非宿儒莫辯以經術朝廷大
體非故實莫稽於政要獻忠納規力不足者負乘致寇

誠所宜然官謗已招身尤何塞况秦中帝里天府與區
俞往重寄於臣復忝寧有拜則侍中遠慙於軒厯同居
相國多謝於漢圖以臣兼之胡顏而處伏惟應天皇帝
陛下中興景運大造羣物恩周動植故惕慮以求衣化
穆彝倫豈非材而補袞伏乞矜臣由衷之請覽臣自卜
之祈更擇俊賢曲垂一作昭亮維鵜之作不列於詩人
振鷺之儀載揚於史筆臣所以敢守難奪期於必行無
任慙懼悚戴之極謹詣朝堂奉表陳讓其所讓人別狀

封進

為王尚書讓宰相表

前人

臣駿言伏奉制書以臣為兵部尚書同中書門下三品
制命先臨魂守飛越臣中謝臣素以凡薄何階遠大明
經試吏多從州縣之榮陳力就列豈望雲霄之舉爰辱
皇揆屢叨一作延宸渥出則雄藩重鎮仗鉞臨戎入則副

相常伯彩纓旅位負乘致寇福過生災昔忝今職將貽
法罪矜臣愚者聖慈宥臣直者天斷曾莫報効仍紆寵

光吏部升冢宰之司并州尹興王之邑臣每自料竊不
遑寧豈悟衡軸之委韜鈴之要無通知四夷之畧乏決
勝千里之才使臣為之非敢矯飾缺邦家之望則物誰
謂一作論為宜塵日月之明則臣何以處伏乞察臣自卜之

審憫臣由來之訴更選羣賢以又成績庶使朝端不虛
授天下知至公臣罄露懇誠期於必遂謹詣朝堂奉表
以聞

為李尚書讓兼左僕射表

崔位

臣某言中使某至伏奉某月日制書除臣檢校某官者
伏惟皇帝陛下以仲春之月居青陽太廟順發生之令
垂溥洽之恩建萬國而親諸侯闢四門而延多士雖成
周析壤唐虞命官穆穆皇皇何以加此天下幸甚臣謬
列藩鎮極茲寵榮捧戴絲綸形神駭越中謝臣聞謙以
立衆明於害

闕

為言在不知退臣敢瀝懇固讓披

心自陳何也臣派演天枝遂階名級立身終始竊慕古
人履官途惟直道而行居聖代而孤立寡援自陛下纂

承王業致理雍熙臣以瑣微累蒙任遇入司宗籍出按
節旄報恩百用未申一割悚惕惟厲中夜以興臣伏以
爵本酬庸秩由崇德無功庸而冒爵秩乖寒燠而怒鬼
神詩有不稱之譏易垂折足之誠仰惟古訓歷選先賢
未有不澤潤生人功在王室而可驟升重位安處大名
況今同軌絕垠韜弦息甲守戎內地甘食美衣舉勞無
汗馬之勤論兵乏出人之畧方將尸素刻責豈意思光
荐加在亭育而則然當覲冒而奚若且桓撥之職而布

於典策優游二

一作三

品師長百寮自漢魏尤難此選非

夫李固忠謹黃瓊奏議羊祜以荊州兼領謝安由戎政

特拜以臣方之遠有所愧臣高祖淮安郡王神通翼贊

神堯竭誠締構勲彰國史方任此官在臣何堪謬繼前

哲循涯省分憂悸失圖垂之簡書不可以訓是願罄露

丹懇冀迴聖鑒察臣辭避之至恕臣量已之誠乞停今

授以俟後効君猶天也焉敢飾詞臣限以所守不獲奔

赴闕下拜舞丹墀無任慙惶懇迫之至

唐僕射雖為尚書省長官號宰

相此表乃在外檢校官合在五
百七十七卷英華誤入于此

第二表

此表合在五百八十九
卷謝門英華誤入于此

臣某言某月日奏事官回伏奉敕旨以臣讓官即宜斷
表者微臣材劣不足動天再蒙中詔曲賜獎飾捧授之
際襟靈若飛中謝臣伏以運屬昌期干戈久戢人懷聖
澤閭里又安臣總戎無分寸之勞為政乏循良之異是
以內思陳力難處百揆之崇外愧妨賢願効九官之讓
而宸私荐及寵命莫迴敢煩君父之聰用申犬馬之志

唯當誓心許國盡瘁在公廉問黎烝訓輯師旅庶立毫髮以副憂勤臣所守有限不獲奔走拜舞丹墀無任感恩隕越屏營之至

為韋相讓幽公表

賈至

臣見素言伏奉某月日制書封臣幽國公食邑五百戶仍特加金紫光祿大夫兼與一子五品臣次男諤又特授五品官者臣才術寡薄操行無取幸因資序謬陟台衡不能變理和氣裨補德化致使四凶搆慝天下震驚

驚與南巡函谷失守語曰焉用彼相易曰負且乘致寇
至由此言之臣雖殺身不足補過且臣值祿山干紀不
能制其命臣與國忠同儕不能正其惡尸忝厚祿竊位
多時一昨扈從之初不即死者蓋以翠華歷險牧圉無
扞駕馬思効且伏轅輿候至蜀城自拘司敗豈謂渙汗
大布網豁江河茅土猥加恩廻日月當今天下未定忠
義驅馳類表作並驅封賞之行不宜踰濫借如翼從行李操
執鞭轡臣子職分何名為功以此受封不可以訓貪榮

冒寵非臣所圖伏願俯垂矜憫捨此階爵不使臣父子得罪於公議見嗤於有識微臣幸甚不任懇迫之至

文苑英華卷五百七十二

欽定四庫全書

文苑英華卷五百七十三 宋 李昉等 編

宰相讓官二

為桓侍郎讓侍中表一首

為晉公讓中書令表一首

讓兵部尚書平章事表一首

讓封燕國公表一首

讓中書侍郎表一首

讓右丞相表二首

讓中書令表一首

讓平章事表四首

久旱陳讓相表一首

為蕭復讓宰相表三首

為桓侍郎讓侍中表

吳 兢

臣彥範言伏奉恩制除臣侍中光大之命忽降望表顛越之懼頓積心涯臣其中謝臣聞君子樹功心在利物義

夫建策口不言賞故田疇以責塞為

闕

趾達於閭里筮仕本祈於州縣

屬天道貞觀功能咸錄曾未一紀殆將十遷三八憲司
莫禁奸宄再申會府寧禪準繩掌棘木之刑訟聲詎弭
受羽林之寄軍容未肅循省知懼寢興弗遑頃逆豎等
潛構禍端竊窺神器外結兇黨陰懷密圖則天大聖皇
帝天縱睿明察之於將兆陛下性命疑神武擒之於發
機臣職統士卒受命梟斬此宗社之福也陛下之明也

臣何力之有焉金紫佩腰已虧於曩節貂蟬冠首胡顏
於後命不出旬朔頓越等倫臣知不可物議誰塞臣又
聞暴進者懼咎知止者無辱詩有匪服之議易著折足
之誠歷考前載益用惶惑且賞罰之柄國之大典罰一
罪使天下革心賞一人使天下知勸今皇極肇建明命
初基惠化始覃而賞勸失中此臣所以固讓也況此官
出納帝命喉舌王言政之治亂實所攸繫豈可以微蚋
之力能負丘山一葦之航克濟溟渤伏願覽任官惟賢

之旨察量能受職之義寢已施之澤鑒不奪之誠幸甚
幸甚

為晉公讓中書令表

苑 咸

臣某言臣聞百工允釐方可咸熙庶績九流不雜所以
彌獎人倫苟非其才胡顏妄處中謝臣智識凡近藝能瑣
薄徒以遭逢運遇預奉休明謬忝宗枝特承甄拔爰從
散職拜以中司三入仙臺兩登禁掖久於近密衆莫能
過念臣愚者聖慈收臣直者天斷頃者外總戎律曾無

決勝之謀內叅鈞衡實實推賢之舉將何以彌綸庶政

翊贊雍熙以此慙

一作回

惶無忘鑒寐況中書理本軍國

務重事無巨細稟於睿旨暫愆時雨陛下每降於親祈
未有邊塵陛下尚勞於遙詔無幽不燭有感必通在臣
何人叨居大任雖願荷恩効力更勉驅馳其如竊位妨
賢自多愧恥鴻私茂寵於臣已極纖勞薄効在國何施
況貞觀已來相無宗子唯臣忝越擢自宸衷誠宜粉骨
碎首

闕

尸素之嫌久招輿議屏退之分

臣之宿心實恐上累明時下玷良史比因趨奏屢有陳
祈天眷未迴聖情猶阻伏願陛下察臣之情憫臣之訴
賜疑臣止足之分恕臣不逮之力賜停今職退守閒司
且臣感恩至深報效殊淺儻中外任使衆所辭難臣願
先登冀罄誠節豈敢偷安重祿自保優閒特望更選羣
賢以秉成績庶使朝無闕政天下稱公區區懇誠期於
必遂不勝戰汗惶懼之至謹奉表詣朝堂陳乞以聞

讓兵部尚書平章事表

張說

臣說言伏奉九月十九日制書到并州授臣兵部尚書

同中書門下三品王人在門驛騎臨

集作首

路奉恩循分

以慙以惕臣說中謝臣早以書生射策載筆聖朝晚以

軍誌典兵秉

集作擁

旄乘塞祿非授進

集作授等

寵是宸衷久

侍玉階四掌綸誥一心好直三黜其宜今復用之猶夫

人也何足以舉明邦政光緝帝猷更策疲驂來塵法駕

又臣已受命司籍專意簡書所希散冗因閒就業忽叨

劇職責大憂深人心有限事難兩濟國史無成臣執其

罪上思薦賢以自代下願守分以全節竊見開府宋璟
清介獨立倚法不回詹事陸象先清明向道臨事能斷
其高明有素歷朝之所仗委其積行無疵衆人之所體
信揆停往任未盡宿誠乞廻此恩以納來効必能補舊
政之缺漏廣前途之軌轍雖探心角力臣頗與二子齊
驅然校德考年彼皆有一日之長天下者累聖之公器
宰相者萬方之具瞻臣所以廷讓彰言不陳密啓伏願
聖恩聽輿論

二字類表集
本並作輿論

而舉俾諧僉矚儻朝任得人

實海內幸甚無任力微任重惶懼之至謹奉表陳讓

讓封燕國公表

前人

臣某言伏奉今月七日制書封臣燕國公食封三百戶
寵靈猥及中心如慙臣某中謝臣聞至道之時重法守義
上無無功之賞下無無德之祿故授受禮全而踰越不
起伏惟陛下光撫寓內大寧天域百度惟新萬靈翹注
建侯疏壤允答元功臣亦何人首膺是命一作首自古
有傳道而爵說經而封蓋以訓蒙成聖資師道學臣之

黷嘉命

侍講有異前聞何者大明朝昇螢燭無助時雨夕濡浸
灌焉施幸得依附光景游泳渥澤豈敢虛承啟發之恩
謬荷將就之報且如人臣之義二則為罪一心不回愚
智之分譬如犬馬有不背之性草木有不凋之理知何
德於天壤而欲蒙造化之偏施哉臣之無功正與此類
叨恩過量終懼且慙乞廻聖慈以容介節無任惶悚之
至謹詣朝堂奉表陳讓以聞

讓中書侍郎表

說以睿宗即位為中書侍郎景雲二年方同平章事疑不當入

宰相
門

前人

臣說言伏奉制書除臣中書侍郎寵命俯臨驚魂自失

臣說中謝臣聞雲構鬱起非

類表作豈

枳棘之任天波暴集寧

溝澮所容臣識無通方文不經國南宮華省已忝前行

西垣內閣

集作閣

將陪近侍心慙官謗跡愧時流何以承

掌王言贊決機務當今二儀再造百度皆新太平之基

惟賢是與混成庶政責在中書豈以常才敢膺首

類表作榮

選乞寢恩命改擇時髦惟慎庶官以諧僉議無任悃款

之至謹詣朝堂奉表陳讓以聞臣所讓人別狀封進

讓右丞相表

臣說言伏奉制書除臣右丞相兼中書令臣學慙稽古
早侍春官階緣舊恩忝竊樞近雖思致君堯舜而才謝
伊臯今屬升中大封方求俊乂猥集作升端右實愧朝

行乞停新恩獲守舊職辭訥情懇希垂察諒無任屏營
之至謹奉表陳讓以聞

二

臣說言伏奉今月十日制書除臣尚書右丞相恩命自
天戰跼無地臣說中謝臣少長儒門墾鑿墳史才非高格
官不因人徒以命偶龍興位階鴻漸五入西掖七踐南
宮中間拙延謫放直招玷缺傷矢之禽聞弦虛墜賜環
之客聽歌先泣此則魂一作魄為危感氣由懼奪安可重
收廢器再辱端揆何以師長禮闈正持憲府當今典章
革故風教鼎新野無四隱朝有三傑具瞻之地願擇時
髦臣幸沐遺簪墮履之恩好生養老之德朝遊簡牘暮

對圖書受賜無涯循榮過分豈更干處士之橫議招徇

奴之遙哂艾

英華作
文非

骨自瘡負乘致寇雖則愚情懷戀

覲冒求寵亦望聖慈限約令

集作
生非

度餘年願停今授長

守舊史罄陳肝膽非敢飾讓謹詣朝堂奉表自乞臣說

誠惶誠恐頓首頓首死罪死罪謹言

讓中書令表

臣說言伏奉今月十一日制授臣中書令恩渥自天震
越無地臣某中謝伏惟陛下至孝安親大功定國六合翹

首庶政惟新雍熙之化望在茲日中書理本臣叨首名將何以翊贊聖君光澤天下自臣攝官禁掖已涉七旬不知賢才以舉是不仁也不辨不肖以退是無勇也何足以備乎宰臣胡顏冒恩復受真拜臣之愚執正在於此不敢繁詞以塵聖聽乞迴榮授改擇時髦無任懇款之至謹詣朝堂奉表陳讓以聞臣所讓人別狀封進

讓平章事表

前人

臣說言臣伏奉宣旨制書以臣同中書門下平章事承

命戰汗拜舞失容臣說誠惶誠恐頓首頓首死罪死罪
臣本書生器識凡近仕不望於通貴祿只宜於代耕蒙
時寵榮越踐臺閣局心守職竊所庶幾長筭經邦則無
逮及伏以廟堂寄切軍國務殷循涯審分非臣攸處為
國者為官擇人為臣者陳力就列若志小謀大力微任
重豈敢顧惜賤軀實恐上塵王政是以披露肝膽不暇
飾詞乞停此授俯遂誠請無任怖懼慙惶之至謹詣朝
堂奉表陳讓

集作請

以聞臣某云云

同前

裴度

臣某言臣聞知足不辱知止不殆若險危而久處驚劣而又病則顛隤之期斯須可待况臣本性褊狹久塵樞近衆所謂否心有可焉衆所謂可心有否焉則皆盡言莫敢畏避所以居多忤物動不適時聖恩雖為曲全人理終難自咎臣某中謝伏惟尊號皇帝陛下紹開洪業再受景命盪諸夏之妖孽致羣生於仁壽臣之厚幸遇此昌時徒荷聖功莫効分寸乞避賢路少安疲病臣不敢

廣引前事崇飾虛辭直以折足為憂冀有保身之望若

任在

闕

可以匡輔朝廷則

臣以生前豈敢愛惜性命但以去之無損留則可哀

一作

畏儻受始終之恩是全進退之道無任惓惓之至

同前

李吉甫

臣某言臣久處繁機切思退免伏奉詔旨未允深衷仰戴天慈如寘冰谷臣某中謝臣竊惟至敬豈敢煩文再以懇誠上陳睿覽伏以陛下初臨寶圖獲侍丹宸一心捧

日見四海之大

一作文

明八稔代天覩羣生之茂育恭承

睿算實罄愚衷雖微寸功豈敢纖負倘陛下存簪履之
舊念葵藿之誠終全深恩退蒙厚禮則是陛下既假之
以位又寵之以名至德深仁光昭千古況臣年齒雖長
筋力幸全猶得申獲戰之功展死綏之分倘蒙麀臯使足
可酬恩至於左右便繁朝夕機務則心憂智竭力所不
任以此至誠期於允遂然以時不再得感王道之方平
福不重來念君恩之已極進退惶戀罔知所安謹再奉

表陳乞云云

二

臣某言臣昨八日再表自陳九日於延英奏對公事既畢輒言私情陛下語臣以兢懼之由諭臣以進退之義今奉批答令斷表章無涯恩渥木石知感況陛下俯鑒誠懇知非飾詞鑒以止足之心特申分列之外敢不上尊明令退抑微衷恪居官次更館疑仁恩顧伯玉之未果徒慙聖私秉安石之偷安猶期他日銜恩之分萬殞

猶輕不任感戴惶悚之至謹再奉表以聞

久旱陳讓相表

常 袞

臣某言臣聞陽唱陰和合之則理任重力寡強之則顛
苟稱竊位何所逃責伏惟陛下以大聖之資除去奸惡
臣荷承正刑之後擢在台衡不能有所建明坐致災旱
燮理之任虧忝固多邦畿之間愆亢特甚陛下發勤閔
之慮躬旰昃之勞大憂庶獄並走羣望而踰夏涉秋天
則不雨垂落復散人其謂何伏以東漢之制存乎舊史

或陰陽失節水旱不時必策免三公勵精百揆蓋以其
陽唱而不和力薄而位崇所以答天譴也今上立赫赫
如此舊史昭昭如彼臣尚以愚劣偷安廟堂負乘不慙
覲冒難處伏乞解臣所職更擇良才省致旱之由求作
霖之輔則萬姓咸賴百穀用成上寬聖憂下塞人望臣
敢尸位重祿以負明時無任兢惶惕厲之至

為蕭復讓宰相表

齊 映

臣某言臣不幸多疾且昧攝生積年不瘳遂成沉痾內

有五臟心病轉深外有四肢足力不逮豈可叅掌密命
趨侍玉階上負聖私下曠公事縱恃恩無懼而省已何
安臣某中謝臣以為寵祿不可苟偷疾病實難自強所以
每轉一職常積憂惶自頃受官累經陳乞及奉天拜命
陛下殷憂臣合捐生豈敢言病況當憤切所致實亦患
苦自忘今逆臣殲夷庶物忻暢餘生獲奉宿疾頓來豈
無諸醫竟未有效忪悸之疾動發無時事輒經心病則
加劇或達曙方定或彌日不瘳神形怙然若無所據又

風痺之狀趨步蹇澁往來扶策自不能持念此餘生顧
成廢棄豈宜叨處榮位貽穢台司聖恩縱欲優容公議
實難逃避特乞賜臣骸骨待盡丘園冀勿藥以稍痊實
殺身而非報無任懇迫惶懼之至

第二表

臣復言臣以沉疾在躬不任所職每因召對輒具上聞
遂敢重表陳誠所冀俯迴天鑒伏奉還詔未蒙矜允慙
惶靡據冰谷再一作在懷臣某中謝臣竊以幹事先於志

氣立朝本於威儀威儀整則朝無惰容志氣強則事無遺理今臣足疾近安敢高行止年又衰殆豈任機務況自宣恩復命僅歷七旬扶疾趨朝惟經再月竊惟非據何心自安聖慈雖欲優容公議實難逃責且頃冒榮獎屬當艱虞在中無獻納之能奉使乖撫綏之術涓埃莫効僭忝實多上孤恩私內苦疲繭將何以奉中興寧濟之道致太階平一之符夙夜愧怖精爽飄越伏惟皇帝陛下高覆厚載慈惠生成矜臣朽僊賜臣首領豈惟微

臣免曠官之罪實亦聖朝廣全育之恩

第三表

臣復言臣以病曠官合從罷免累陳丹懇冀蒙允察再奉墨詔猶未優容受恩則深揣分增懼臣某中謝臣聞循已就安聖賢之深誠捐軀報節臣子之大端況臣一門荷恩四葉為相謬以姻戚光于宗親殊私未酬微命寧顧但苦病在方寸慮事則愈昏職近宥密尸位則多曠今四遠氛祲尚未廓清萬幾損益皆關聖慮是明王宵

肝之日賢哲馳騫之秋豈臣妄庸所當毗倚犬馬之戀
雖欲遲迴夔龍之行詎宜塵穢伏乞曲留宸鑒俯察愚
衷矜臣量力之請免臣妨賢之責私誠獲遂公議允諧
無任惓惓悚迫之至

文苑英華卷五百七十三

欽定四庫全書

文苑英華卷五百七十四 宋 李昉等 編

宰相讓官三

代杜司徒讓平章事表一首

為鄭相公讓中書侍郎平章事表一首

為齊相公讓修國史表一首

代人讓宰相表一首

為杜相公讓河南等道元帥表一首

代裴相公讓平章事表一首

為集賢崔相公讓大學士表三首

為蕭相公讓官表一首

代杜司徒讓平章事表

呂溫

臣某言伏奉恩制授臣檢校司徒充度支使兼鹽鐵轉運等使依前同中書門下平章事恩獎殊常授任非據承旨慶忤省躬慙惶中謝臣素無異能幸逢昌運頃因人舉累荷國恩聲績靡聞塵忝增懼陛下丕承景命光

聞鴻猷理財阜人尤所注意臣竊位時久妨賢愧深柄
用之地甘心自絕豈謂大明私照立造曲成俾參論道
兼領經費當至化鼎新之日在微臣遲暮之年將何以
上副宸衷外弭官謗負乘為盜一作寇冰炭在懷庶遵周
任之言敢飾范宣之讓伏惟睿鑒俯亮愚誠特降殊私
賜寢嚴命則聖朝無虛授之議微臣遂審已之宜遐邇
之間孰不知勸無任懇迫屏營之至

為鄭相公讓中書侍郎平章事表

權德輿

臣某言伏奉今日恩制授臣中書侍郎同中書門下平章事詔書自天受命惶悸俯伏循省不知所容中謝臣聞宰理中樞從古所重貞教化之本導陰陽之和外撫四夷內循百職或乖於是則謂曠官臣志在服儒才非經遠爰自筮仕期於代耕而遭時踰量踐歷朝序自奉禁中之職累叨望外之恩超貳冬官兼司選部流品未序銓綜乖方以榮為憂伏待譴責豈謂特延睿渥叅列

廟謀以瓶筭之資當柱石之重況臣自去夏尚守臺郎
周月之間遂懸相印承陛下厲精之切副陛下則哲之
明循量省躬必知不可伏乞俯廻詔命別選公才敢瀝
血誠上黷天鑒無任惶懼懇迫之至謹奉表陳讓以聞

貞元十四年七
月二十五日

為齊相公讓修國史表

前人

臣某言臣去月九日於延英對陛下勤求理本語及史官
遂命崔損承旨令臣兼修國史臣省已無取受恩殊常

蒼黃震驚未及陳露今日中使某乞奉宣進止授臣此
職竊自思忖非所克堪感戴屏營不知所據伏以褒貶
善否裁成義類直辭是繫往哲攸難臣謬踐台司無補
皇化每憂覆敗上負聰明豈足以再紆宸慈累忝榮渥
稽前古之彛訓昭聖朝集作明聖朝一作聖明之法誠立言載筆
豈易其人量力循涯自知不可又自貞元四年李泌後
宰臣遂不兼此職蓋以論著慎重留於聖心自非時謂
全才何以遠循故事用此內省以榮為憂況君舉必書

時同堯舜之理任人以器顧無遷固之能所覲殊私特
寢成命無任感恩惶懼之至

貞元十八年
五月十八日

代人讓宰相表

白居易
為徽之作

臣某言伏奉今日制書授臣某官同中書門下平章事
者寵擢非次憂惶失圖跼天不知所措臣某誠兢
誠惕頓首頓首臣聞上理陰陽下平法度外撫夷狄內
親黎元使百官各修其職一物不失其所此宰相之任
也臣有何功德有何才能越次超倫忽承此命下乖人

望上忝朝經致寇速尤無甚於此臣謬因文學忝列班
行先朝乏人擢居內職星霜屢改爵秩驟加未逾十年
忽登相位名浮於實任過其才豈唯覆餗是憂實累知
人之鑒况陛下肇開厯政將致升平輔弼之臣尤宜慎
擇臣粗知古今敢言本末若樞衡要地初不得人則理
化勞心終無成日此所以重陳手疏再瀝血誠乞廻此
官別授能者臣若得其請便不負恩情見於辭非敢飾
讓皇天白日實鑒臣心無任懇款屏營之至謹奉表陳

讓以聞

為杜相公讓河南等道元帥表一首

常袞

此篇見五百七十六卷

代裴相公讓平章事表

杜牧

臣某言臣伏奉今日日制書除臣某官同中書門下平章事者祇奉成命進退失圖捧詔兢惶銜恩戰慄臣誠惶誠恐頓首頓首臣本書生仕逢聖代掌綸言於西掖

作藩守於名邦自顧才能已是踰越陛下獎遇不次拔擢過分春闈典貢地官掌財咸無政能粗免愆闕及擢為莞榷累受寵榮雖竭盡疲駑欲裨萬一而才疎智拙不効涓塵夫宰相之任前賢有言如涉川有舟如幽室有燭代天理物為人具瞻豈伊小臣而膺大任今朝廷髦雋並集集作髦俊並作名德森然或多歷庶官或皆有功實或四方屏翰或已著勲勞舉而用之無不可者如臣凡淺豈宜委任伏乞俯迴天鑒更擇時賢必能丹青帝國

金玉王度使微臣無尸位

集作
祿

之誚聖王有得賢之名

非唯微臣獲安實亦天下幸甚無任惓懇血誠之至

為集賢崔相公讓大學士表

錢珣

臣某言臣昨奉恩命加臣某官者非常之澤稟命實難
今月某日已奉表讓訖伏慮聖慈所注宸旨未迴累足
屏躬自逃無地遂敢再傾肝膈仰告睿明臣雖至愚非
敢飾讓一則副陛下用臣之公道保陛下知臣之遠圖
一則惜朝廷之典章重朝廷之爵秩永惟矜鑒在我聰

明伏以顯賞之恩殊勲是稱凡施君命必合國章昨者

逆將興妖急兵

一作稱

構變災匪同於天作患實過於主

憂咎在輔臣理當昭憲但臣久罹強劫莫扈出居走間
道以獲歸乃王靈之所被免致陷身之禍得陳拜首之
容伏蒙陛下特閔驚危盡寬罪戾收雷不振就日復安
尚處弼諧空知慙感至於遽停輦輅近駐郊圻廟貌不
遙園陵可望是陛下孝通祖考所以不遠京師也又能
庇茅茨抵臨草莽潛施英畧使殄逆徒坐待梟夷風行

號令然後決乘輿之反正慰父老之怨思謀夫自多睿
志先定是陛下精感社稷所以不移節序重啓昌期咸
資聖斷臣將何力可助立功比者殊渥遽臨莫知所以
為賞之僭懼及淫人春秋正言國家大事聖朝行之則
有損微臣受之則無名且臣叨荷休明貴為宰物兢兢
守道尚懼僭尤汲汲經邦未能報効今伐叛之地實非
近藩虜馬方飲於渭川戎帳頗施於秦甸農商半收貢
賦鮮通中外未安宵旰多慮凡垂恩澤先布瘡痍次及

勲功方為

闕

元和聖武乃顧淮

西宰臣裴度總統全師削平宿寇勤勞忠烈史策昭煥
獻捷還都書勲行賞持衡之地但加金紫之階詎是憲
皇之恩澤不深裴度之勲名不盛此乃愛重勳憲保持
大臣遂令賞薄於功欲使衆稱其美列祖遺法陛下聿
修在臣感恩欲增聖德中書故事常欲兼官雖當叙進
之間亦在歲時稍久錫之有度拜者則安臣又非宜朝
將何論莫食之命令典俱存求而論之斯事非細軍儲

方因公聚正虛郡國凋殘乃陛下殷憂之本臣僚艱窘
是陛下軫卹之秋而宰臣獨以膏腴贍其封邑人情頗
惑事理不通承命以來連宵審度粗能祇荷皆欲寵光
何敢進犯天顏尚煩俯察誠憂赫怒其可苟安不言則
負任使之恩有讓則違獎擢之旨有違無負明主必容
情激辭多憂緣寵過伏乞特廻霈澤且使燮調息致寇
之危疑合興邦之理道臣某無任死請迫切懇悃之至

第二表

前人

臣某言臣昨蒙聖恩加臣某官實封等瀝誠雖切天鑒未回今月某日又奉宣命賜臣持危匡國致理功臣者寵光踰溢俯僂驚惶昨已奉表陳讓訖恩出一時事非常典衆方興論內不自容是以伏紙寫心累千睿鑒未蒙俞允匪獨驚危朝省夕思且涕且激臣腐材弱質叨列公台何施尊主之能未立為臣之節而艱難之後陛下待遇愈優食必分甘言皆動色弘慈厚禮前代所無比及今茲適當反正斷一作頓自不疑之旨遽行非次之

恩則臣竊驚孤心兼量愚分仰酬萬一且合如何至使
堅讓未休蓋亦深知不可上惟聖德恐有失中受詔之
難血誠在此陛下以歸復之慶謂臣有參贊之功嘉謀
既出於玄機勝畧必資於英決恭惟茂實前已備論上
聖推不宰之心而具臣乏可書之績則甄賞之命遵行
及私唯增鄉校之言兼致匈奴之笑否臧足驗損益可
知況臣在中書又殊同列彥若與博執政在臣之先或
累歲變和或踰年鎮撫弼違斯切成效固彰臣自再忝

東鈞初當變律未調鼎餽徒辱車茵遂罹向闕之兵莫
救燎原之火至于今日無補立朝寵獎重恩臣實非稱
伏以奠食之命雖著舊章蓋上將平戎大勲卓立超酬
特賞始可勝任行於文臣此事固少況在今日不並往
時天下編氓殆無膏血筋力盡疲於戰伐經營多廢於
耕桑所在聚兵肆為厚斂不免者痛侵剗剝可免者患
至流亡鄉敝家殘不勝條說寧於此際更可重傷兼計
百戶之封歲當五百餘萬軍儲常廢國用急須以此校

之所濟非少今陛下焦勞睿算臣等涸竭智謀蓋為朝廷日憂匱乏曷若廻非宜之恩命救急務於公家聖慮既寬臣心自泰生人不加於怨苦經費自濟於艱危弘陛下為國之資伸微臣代天之極幸以是竊度實敢固違加臣之名本加^疑武將伏自先帝興復之後宰臣特授殊恩且類權宜何光定制况臣執政為日未多安可輒冒憲章當此多數伏自陛下光承丕構實耀英謀如秦權黃錫之凶徒及近歲逋誅之大寇載揚我武克致

明刑此外凡有兇渠未嘗漏網聖功神畧可謂赫然去
年公卿等合彼兆庶之心遂有鴻名之請封章四上伏
奏累陳陛下以時未戢兵人多言病不循令典不顧羣
情久執至謙畢奪衆怨作聖有歸於公堂上言敢犯於
聖明夫元首股肱闕

陛下讓懿號於去年臣則受鉅名
於今日闕
不同一體之榮與之則臣蒙姑

息之愛矧於事實未合便宜近者國之名器多假諸侯

法度久踰改張何暇宰臣謹畏再務率先尚慮驕矜不能儆戒陛下若於朝廷未安之際藩方難一作臨制之時

忽使輔臣併加殊事則勲侯戎帥越例貪求中書自思無以奏奪空煩聖慮益壞政經是因今日之恩復作他時之患諒非細故得不極言累陳切讓之辭庶獲洞開之鑒上祈聖哲備識愚衷寵渥未收憂心如灼生惟富貴誰無崇盛之謀禍在滿盈臣有顛危之懼方承任使必覲哀矜伏乞聖慈速降明詔允許臣某無任瀝血輸

懷祈恩俟命激切惴惴之至謹奉表陳讓以聞

第三表

臣某言臣叨膺殊渥特越常倫一縷千鈞非能比重累
綦加卯何足為危是以繼獻封章而陳肝血宸衷益注
寵數不移未允愚私如中狂疾伏以皇帝陛下恢張天
覆優遇宰衡流澤而唯恐不深錫爵而惟恐不重欲行
君德更邁古皇茂典畢申睿慈未足內惟感激旁有神
明則臣報効之端合識安危之道臣昨者辭讓繼具鋪

陳不敢更俟煩文上干聖覽但以陛下大崇儒術多悅
羣書經誥之間講論尤切察臣子去就之分考生人禍
福之源固以精辯否臧盡詳炯戒今臣之懇激尚敢披
陳夫貴而知懼者春秋所書祿不期侈者尚書之訓苟
忘斯論何以全身況臣之年歲當丙子四十強仕血氣
方剛求之族類之間初在簪裾之列而臣亨逢廣運夙
忝重官爰自前年已居台輔至于今日復列鼎司享於
極位之中處在羣寮之上潛憂弔者已在臣門凡有寵

光每宜畏避則官無厚謗天祐微躬上可以永保陛下之恩次可以善守先臣之嗣是非之際物理甚明如或終自昏迷仍貪寵利害盈之罰更在何人太盛之災不到他日今陛下以崇名重器豐祿殊榮併壓臣身必速天咎倘此期未至尚或苟容而焚灼常苦於寸心芒刺日加於四體精神紛擾疾疹交侵便至乞骸何能充位雖臣欲陳綿力粗補萬幾更策懦才何康庶政固無門於立效徒抱恨以自尤且臣在同列之間擢用最近等

衰之制輕重有宜今臣所蒙制命授集賢殿大學士序
遷典典寵飾新恩難有固違謹當祇受其功臣名號官
階爵賞實封等深思僭溢必致遭災敢激飾讓之名願
擇常存之福且將勤勵獲佐盛明直露情私寧欺君父
伏乞聖慈終賜矜允臣某無任迫切泣請恐悖之至

為蕭相公讓官表

元稹

臣某言伏奉今日制書授臣某官者恩加望外寵過憂
深魂魄驚翔手足失墜臣某中謝臣猥以凡材謬居重

任當陛下維新之始辱陛下爰立之恩有累樞衡無裨

衮職外致匈奴之哂內失蒼生之心推換炎涼因循德

澤妨塞賢路塵忝台階自顧疲驂方求息駕豈謂陛下

特迂神鑒曲盼凡材

集作曲用朽材

再生

集作提

腹背之毛重委

股肱之地大辜

集作孤

人望猶簡帝心雖君父深恩莫知

其惡而駑駘力竭何以自安豈敢退而生光

集作全

實願

求其死所伏望再移天眷重選時英特廻加膝之恩別

受沃心之相全陛下始終之道成微臣生死之榮無任

懇迫慚懼之至

文苑英華卷五百七十四

欽定四庫全書

文苑英華卷五百七十五

宋

李昉等

編

宰相讓官四

讓中書侍郎表一首

代史館相公讓官表六首

為王相公讓加司空表一首

為徐相公讓加食邑表一首

為中書崔相公讓官表五首

代史館王相公讓相位表二首

讓中書侍郎表

令狐楚

臣某言臣聞斗筭之器不可持盈腹背之毛安能翔遠
是以知進忘退易象之深戒在寵若驚道家之切訓此
微臣所以皇皇然久積肝血銜恩陳露而未得者也中
謝臣代業儒素心游文史雖自勵已豈敢發身始望之
官止於中臺郎吏外郡牧守而已幸而因緣昌運遭遇
盛時振拔羣倫驟登台袞伏惟皇帝陛下欽明御歷睿
哲配天華夏宅心俊賢翹首方當選衆固合退身豈意

遷於皇閭之崇叅以紫微之重特出睿旨不因人言九重所知萬殞何荅誠宜建用皇極保合太和弘聖功於堯舜之時追恪德於夔龍之列而和羹乏用覆餗為憂空有仰於清光實無裨於玄化一自叨竊遽經炎涼跼影兢魂痛心疾首伏乞鑒其悃款察其疾羸賜以冗員寘於散地溥求俊傑委屬鈞衡則大君知人之明永光於典策微臣妨賢之責將息於輿言一作廟朝天下幸甚微臣幸甚不勝感恩屏營之至

代史館相公讓官第一表

錢珣

臣某言伏奉今月十三日制命授臣某階某官仍加食邑一千戶今日獲於延英親承聖造瀝懇陳讓未賜允從臣某誠感誠憂頓首頓首臣聞衽席之上讓而坐下人猶犯齒朝廷之位讓而就賤人猶犯貴人情之間讓猶如此況其不讓無犯則難而復台輔至崇鈞軸至重頃年陛下擢臣秉政莫獲固辭已乖戾於當時敢因循於今日伏惟尊號皇帝陛下於君臣之際今古所希有

善必知有過必掩使之夾輔恐不光昭故重器崇名焜
懼而常思假寵進言

一作良

論道周旋而盡鑒推誠上感

天心臣非木偶今之讓爵蓋懼生災猶慮天下之人將
有所犯敢於翰墨畧布肺肝且陛下示以殊恩增其貴
秩當庶事苟同未稱在衆心必以為非旒宸寓臨宗祐
權設有兵革未能載戢有法制未盡公行凡此憂虞不
遑寤寐茲以受命可謂稱乎聖澤纔流謗言亦至縱朝
行為臣箝結顧寰海必自沸騰則上有私於輔佐之間

而臣

闕

啓災咎之本錄

緣一作

是終始揣度進退驚疑以

此拜章實期得請陛下加臣以渥澤不若使臣合物情

寵

一作措

臣以光華不若遣臣免災咎儻人言不息天咎

必來焉得自隱自欺不披不露懇悃伏惟洞開睿鑒俯
循愚衷且遣粗安更容陳力廣至明之德罷已降之書
昭示四方用新聖政臣某無任感激惶懼屏營之至

第二表

臣某言伏奉今月某日批詔具承聖旨臣昨者固辭寵

休有異常等然始以謙讓為說終以災咎自陳未能便
動天心上回睿渥復傾肝血進拜封章直舉其言冀蒙
昭允臣某誠迫誠懼伏惟陛下寬明有制聰哲成文揚
憲祖宣祖之風冀元和大中之運故欲治而尚亂欲泰
而未安潛測聖懷常縈百慮臣為宰輔得不周知且自
去秋以來國步未復臣每思人事每揣人情內激肺腸
有如湯火陛下當食不美當寐不甘欲以攻苦食淡之
心抱公滅私之道致陛下之理釋陛下之憂然而再秉

機權未能致此者蓋臣去已之事尚有因循防患之謀
率多容易若臣去已必決防患必專天下之憂庶幾稍
改而祿位輕授之弊近歲愈深上自侯王下至卒伍受
爵賞者所承不重荷恩澤者所感不深蓋緣族類之間
踰謬者衆不重則無以勸其戮力不深則何以激其盡
心因之且不稟朝廷不畏法度不稟必亂不畏必危本
末之間實出於此今臣貴為四輔重有萬幾階秩就加
朝廷常典又何必齷齪謙讓而違君命也但欲審度去

就明辨否臧以臣去已決烈之心拒天下越等干求之

患使爵賞不濫與

一作及

恩澤不妄加則承之者必重感

之者必深如此自凜朝廷自畏法度有患可弭有難可
平此事非所難為祇在陛下明察倘或信其誠請遂寢
新恩則君臣之志氣大同理道之根源必正若陛下不
顧其說在臣亦欲何為但抱憂惶難居夾輔有渝斯語
是謂明欺君道始終聖情深淺祇期遂志不敢匿情再
黷冕旒若臨泉谷臣某無任迫切惶恐俟命允許之至

第三表

臣某言臣昨者再獻封章實披肝膽而詔書批諭德澤滋深有志未從有言未納雖屬沍寒之候不勝流汗之憂臣某誠悸誠惕臣聞帝王以國事之重倚於輔相者既觀舉直之誠必責理平之效故責之必信信之必終然則歷覽古今此乃明君遇賢臣之事今陛下明德非臣獨知臣之非賢人共知耳而待罪之位非次久居陛下知臣之心處臣之地每升便殿常認聖慈謂臣輸寫

甚忠舉措多直每忝大政皆聽淺謀有間之言無從而入至如一昨忽構羣邪奏密而左右不知禍鉅而本根已固雖傾陷盡闕

一作關

於大事而譖傷先在於微臣陛

下知臣素無他腸知彼但肆讒口聰明一寤擊斷不疑否則臣永抱幽冤已當誅殛棄逐奸臣之日忽降渥恩蓋欲使中外之人明知遇臣益厚以茲銜謝詎並尋常則臣自此事君自此執政每圖報効且合何如所以固讓重恩深申血懇昨者所陳章表始末以去已為言蓋

欲以人情所難為臣願為之於今日陛下所賜之異寵
臣願却之於此時將使萬邦盡驚致理因茲約束冀漸
和平若臣冒寵不辭何術可制天下至大至切不得不
然今陛下未察愚衷頃疑作頻加聖澤與向來知臣之旨

昨者保臣之心顯有不同臣將何託前所謂齷齪謙讓
臣實不為伏望陛下以所奏之書靜賜睿覽察其陳讓
之懇匪以沽激為名利於國家不避震怒倘陛下將期
復國別欲任賢奪臣迫切之心以示棄絕之旨則當避

賢而退不敢更煩聖聰竊期此言得遂堅請臣某無任
拜首瞻天瀝血隕涕懇激徬徨之至

第四表

臣某言今月十八日延英敷奏親獲固讓官榮徒荷皇
私未從丹悃今日又聞芝檢復閱綸言莫聽鋪陳尚令
祇受臣某誠懼誠迫臣聞高下相遠者天地也而天地
之氣必通所以四時周旋萬物生育尊卑相懸者君臣
也而君臣之道必合所以統理諸華肅齊庶政天地不

通則萬物大君臣不合則庶政乖今臣讓爵推誠極言
防患拜章累日荅詔三臨聖鑒未回愚衷無感耻君道
之難合懼庶政之特乖內負沉憂若罹昭憲是以泣邀
神助往覺魂飛伏念此心匪緣他事推誠為國防患為
君恭惟睿慈寧忍不察且朝廷之勢不强於藩方輔相
之權見侵於將帥隳毀我法制殘虐我生靈臣常結憤
於胷中陛下亦興歎於南面固欲乘機革弊因事抑强
二者之能不假奇術但所行必正所作無私祇於賞罰

之間必與物情相順陛下申命宰臣奉之輦轂皆披頑
器可化而將帥見侵之患日息則朝廷不強之勢日興
罔害政理之大經罔累聖明之全德將使國平時泰不
慮不憂陛下若棄此不從是怠於中興之志矣臣之痛
惜如割肌膚心腹腎腸傾寫罄竭臣血可嘔臣軀可糜
已決之心則不可奪臣某叩頭屈膝無任涕泣泣血精
爽隕越之至

第五表

臣某言臣今月某日延英面獲陳讓後復拜封章詔諭
又臨懇激未遂臣某誠兢誠慄頓首頓首臣聞琴瑟有
不調者尚或改而張之辯士之言良史必記朝廷命官
之典故大於琴瑟之弦公輔求理之謀亦重於辯士之
說況所命者宰相崇高之秩所謀者邦國臨制之機而
臣等堅辭必防他患陛下固奪將啓後艱他患若生後
艱何救且臣伏思陸贄以忠信事德宗皇帝建中初方
為侍從之臣事繫安危言皆激切有不納者必能力爭

當彼寇難之時德宗欲加尊號訪於陸贄遂獻忠言以
為大憝猶存中區多梗是天意去就之際人情向背之
秋若使重益美名必累中興之業德宗英寤遂納忠言
當時轉禍之期實若走丸之速然則以近臣直道奪聖
主鴻名有犯之言莫甚於此今臣讓官辭爵與彼輕重
不同而於危難之中陳匡救之力愛君為國心則無殊
昔者德宗再閱披陳具明損益今臣四上直疏陛下未
察愚誠是何恩澤之深全惑是非之理感泣慙懼知臣

者天然陛下處多難之時欲繼德祖之美彼則深思利害聽一學士之苦言今則可見否臧阻三宰臣之固請臣是以極疑此事是皇天誠陛下之心皇天無親惟德是輔今若尚令批諭抑與寵私則臣恥陛下不如德宗臣亦自恥不如陸贄臣自知其恥天下得不其然積恥成憂積憂生疾心神錯亂舉措顛危祇於旬時必當覆餗便須永棄不見中興以是而思生不如死臣言至此臣意可憐唯在聖明速賜聽允臣某無任俯伏鳴咽以

身候命之至

第六表

臣某言同心同德是為亂臣五獻封章繼陳懇悃復升
便殿累貢切言天高而曾不少聞日近而未嘗俯照臣
某誠憂誠迫頓首頓首臣聞詩云受爵不讓至於已斯
亡仲尼刪詩此言不去則古之為君者非憎其臣而欲
以爵亡之也蓋勸忠勞昭典冊無以加於爵位也古之
為臣者非惡其爵而欲讓之也蓋定是非畏盈滿無以

加於謙讓也得受爵之宜無不存也失讓爵之宜無不亡也古人所謂亡者彼亦不過其身既而有益於君亡亦可也苟或亡身敗國無益於君致亂階於一時流惡名於千載今臣之不讓是長亂階且陛下觀天下之事理乎觀宰臣之心忠乎若天下已理宰臣不忠陛下迫以爵位致其危亡臣則瞑目而歸何害於國若天下未理宰臣則忠陛下不聽苦言但加重爵臣則碎首而退何利於國臣實不畏其亡但當未理之時不可更長亂

階也所謂未理則非聖德有所不能蓋天下承弊日深諸侯不順其理故臣欲以今日之讓制天下承弊之風而正其不順也不草承弊不正不順而望萬人再安四方無事者是抱薪救火其可撲滅乎言出臣口事痛臣心假使嚴旨復臨臣則終讓而已矣自拜疏却類叩閣臣某無任流涕哽切進退屏營之至

為王相公讓加司空表

臣某言伏奉今月某日恩制特受某官者三公之選八

命而居前古以來無人則闕仍開大國兼進崇階言渥

恩則深若紫泉顧名器則重侔秦嶽揣分

一作非次恐揣循

悸難安臣某誠惶誠恐頓首頓首臣忝列公台忽踰半

紀事乖允當識昧便宜何施作相之材但累知臣之道

頃因出狩自合乞骸未臨復國之期敢有逃天之意而

君能得一日且再中空知陪扈之勞獲覩清夷之慶伏

自去歲至于今春每懷失職之憂繼瀝避賢之懇愚衷

無感睿鑒莫回徒齷齪以受譏但因循而竊位何言霈

澤又降重霄寶懃夢賚之人安稱坐論之地捫心自省
沾背不遑雖陛下修道側身發言罪已可卜運興之兆
將承天賜之休然則劔戟未銷江關或阻猶煩聖慮且
乏嘉謀敢於此時輒荷極寵上祈玄造俯信赤心行之
則明主有私罷之則微臣無咎推諸至理是以固辭蓋
欲保全實非飾詐冀蒙矜鑒特賜允從冒黷冕旒臣無
任兢感戰越之至

為徐相公讓加食邑表

闕名

臣某言伏奉今月某日恩制加臣食邑一千戶實封一百戶臣某伏惟尊號皇帝陛下文武應天憂勤厚國旁求翊贊慎擇能賢如臣之才焉可執政徒以其濫承台蔭擢處鼎司屢改流年多隳黷憲莫獲乞骸之便空懷沾背之羞頃屬陛下尚駐乘輿且臨關輔都人久散廟貌未嚴顧居守之重難注宸衷而任使聖言親降霈澤遽行拜官仍忝於緇衣備位不離於黃閣寵靈則固兢慄載深蓋以乍違天顏初達帝里雖南山渭水變王氣

以潛新而荒草壞垣動秋風而尚慘連薨何有編戶猶
稀臣當此時莫知所措實賴祖宗垂祐睿哲申謀兼委
近藩旁分庶事免微臣之獲戾濟重務以有成遂致五
輅鳴鑾六師被甲陳吉行之盛禮正法座於良辰誕告
四方復興景運御日月而無違素志嚮丘園而已動歸
心遽謂聖慈忽加玄造尚責佐王之效重增開國之封
仍容素餐兼賜奠食祇承異數徒冒優恩已虞招損之
譏敢竊好謙之美況佳兵未息公聚多虛詎宜特命輔

臣更加井賦事非允當言必喧傳伏唯曲鑒愚誠便廻
厚渥冀絕謗論且顯聰明臣某無任荷聖感恩瀝懇待
命激切屏營之至

為中書崔相公讓官第二表 錢 珣

臣某言今月某日伏奉批詔以臣陳讓寵光未賜允許
揣分而省躬知懼感恩而鏤骨徒深臣某誠憂誠激頓
首頓首伏念臣之事君也輸忠竭力以從政君之使臣
也增爵進秩以報勞勞既未申寵至必讓凡於庶事皆

在適時當其時不得不行非其時不得不止今臣承命
可謂非時且思加獻鴻名是為常典而去歲之首羣臣
數四拜章願增神武之名用稱欽明之德而陛下永惟
大體堅奪衆心蓋以反正之初艱難未濟仰惟睿旨非
獨謙光欲廣嘉猷深知不可陛下之志既定臣子安敢
復言亦以非時罷茲盛典今臣之愚懇竊合聖鑒去春
方在京師尚隳此事比者猶當巡幸固不可為內度宸
衷必開弘鑒遂敢再披肝膽實期便輟渥恩請候鑾輅

歸還干戈弭息却施綸綍俾合憲章今日皇私則難濫
受可行可止事理甚明伏冀睿慈更收霈澤再冒旒宸
臣某無任兢悸迫切之至

第三表

臣某言臣昨以寵光踰濫循省兢憂兼懼用典非時有
累日新之德再傾肝血實冀允從而天鑒未開愚誠愈
迫臣某誠惶誠激頓首頓首伏以陛下濬哲自天憂勤
為國感屯蒙之未泰先昧爽以有臨臣每奉清光備承

睿旨無言不盡無理不思決去邪懲惡之謀若反掌轉
圜之速况察忠仗信據禮任材誣譖者徒欲橫侵傾危
者皆令立定茲所謂疏通知遠淵靜有謀開四門
明四目者也臣不知昔之令主何以加於陛下之道乎
然睿哲憂勤昭彰如此今宰臣以非時之命有所堅辭
蓋欲朝廷行事得宜天下物情共洽則臣可以制天下
非宜之請廣朝廷致理之端用贊中興以新庶政詎獨
務為飾讓而進犯宸嚴且睿哲則何嚮不通憂勤則何

思不至既通既至必察必知臣之所陳實欲利國神明
所聽毫髮敢欺况有常情亦難自匿臣雖乏出羣之智
纔踰強仕之年幸偶文明方圖富貴苟或拜恩可稱荷
祿不慙則何必固小節以鳴謙干大君而違命跪承批
詔退揣事機讓之則所益必多受之則所損非細仍念
王搏崔胤以懇激拜章并臣披露之辭畧盡否臧之說
雖煩聖覽當察羣心得不得遂有改張遽收渥澤斯為從
善實可經邦且凡受寵休有所退避或名聲不稱或遭

遇非才小則恥識者談笑之端大則憂賢人譏責之罪
今臣於談笑譏責亦不敢以君恩避之實欲制天下之
非宜廣朝廷之政理用光興復永濟艱難仰望聖慈臣
某無任寤寐齋禱激切之至

第四表

臣某言伏奉今月某日批詔以臣堅讓寵章未賜允許
者憂誠若焚駭汗如雨發於肝膈墜在神祇臣某誠恐
誠迫頓首頓首臣聞以欲從人則可以人從欲鮮濟此

蓋左丘明之信史臧文仲之至言陛下多閱正經以資明德固於深旨靡不盡知然而陛下優遇台臣恢張天覆賜爵而唯恐不重流澤而唯恐不深茂典畢申睿慈未足此蓋陛下以無私之欲勸有位之臣使其更竭謀猷以濟難否是陛下之欲也臣匪不知臣所以斯須不寧數固而讓者蓋緣陛下在省方之地有國未歸微臣忝執政之權遇昧未泰謂為輔弼實抱憂慙刻苦厲精進賢讓寵所期天下之士且不加罪於臣既安其心庶

竭其力此臣之欲也陛下之欲不過勉勞臣等三人納
善罷之小無所損微臣之欲使昭示天下之人聽而俞
之大有利利在邦國皎然可知陛下若以欲從臣理
無不可若以臣從欲鮮濟不疑雖又新奉聖慈未容陳
讓在臣丹赤誓不稟遵其於利害之言辯析將盡實以
多為緣飾亦不敢更躡英明進思之心死請而已臣某
無任懇激兢越之至

第五表

臣某言臣事君未盡舉職無聞瀝血懇而黷纒不聽降
皇使而紫泥適至臣某誠惶誠懼頓首頓首臣聞啓乃
心沃朕心哲王所以倚輔相而成理道也然則觀便宜
陳訐謨務匡救而由諫諍不可必奪可者必行竭力盡
忠是為啓沃苟無啓沃何用弼諧伏以陛下自周歲以
來出居未復南嚮而坐聖慮日深思頃來及雷之言還
天下投荒之土潛心有感逆耳多容今大駕方欲還京
宰臣非時進秩上虧聖政旁啓貪謀宇內幸門因茲大

啓竊念久隳法制何堪更自破除倘陛下固行寵光乃
是姑息之旨信任則疎四海得以酌量萬事更當奸弊
且臣固受爵祿惟惜政經盡理極詞未蒙聖鑒則是陛
下棄啟沃而任獨見絕諫諍而惡正言自此朝廷却成
壅蔽凡關得失凡有是非徒欲抗論必無允納則不知
天下之事自此如何近歲宰執加恩不過再陳謙讓至
于今日莫並前時朝省夕思可畏可懼蓋二年之內六
馬再奔若使理道昭彰奸兇凜畏何由致此安得不憂

聖聽雖煩朝綱必振良圖甚大至化斯明若以干犯未
休震怒不捨即臣直視鼎鑊如對軒裳蓋有氣經邦有
心事主死而無悔言實可悲唯恐但留名聲不足弭其
憂患更無多語祇欲長號臣某無任披膽隳肝請罪之
至

第六表

臣某言某五奉批詔尚未允臣所讓官階爵邑者伏以
將相大臣凡被恩命有所辭讓不過再三安則稟而受

之不安者亦許其讓今臣已倍再三之數情固有所不
安聖鑒未開憂心如醉臣某誠恐誠迫頓首頓首臣聞
杜恕魏之名臣也常以立心行事若非明達君子見諒
本心不然則剗心示人與臣何異臣雖不佞常歎其言
知信人難古昔如是然杜恕於族類之內尚興此言今
臣幸以遭逢重為宰執雖論才較智莫稱陶鈞而秉直
輸忠敢欺神聖拜章之請擇利經邦况奉天顏盡披血
懇誓然疑作言莫信死請莫從則臣剗心於丹宸之前陛

下亦當未察兢憂慙歎無地可逃今辭理已殫懇激愈甚蓋臣於不安之事終無受寵之期苟或譴怒下臨臣則伏罪而去干犯宸嚴臣某無任隕涕流汗惶越之至

代史館王相公讓相位第一表

臣某言臣聞君人之私在始終而必遂人臣之分於進退以自圖嘗觀古今莫不如此臣謬從先訓本涉儒流傳之者猶有琴書教之者令歸忠孝臣之不佞頗墜所承唯於忠孝之心實畏神明之責策名游宦止望周行

偶聖立身俄塵大任材同常士寵過素期雖欲遠慕前
修旁探令典窺其事業勵此顓蒙副明主之憂勤避衆
人之指笑而所務者生靈富壽每痛凋刻所制者兵革
弭寧尚聞侵伐赧然備位何以事君不唯久合避賢固
亦尋宜獲罪偷安四輔忽已六年假名器而則崇執機
權而益拙循省是懼斯須不遑然臣於六年之中未忍
為一朝之計者蓋以陛下信其愚直如見肺肝資以弼
諧終無疑問事不幸者必蒙曲恕心不欺者則荷明知

忝異禽魚感深骨髓強陳蹇力用答聖慈今則曠敗漸多智謀將竭不能引退定至顛危况陛下光復京師已逾周歲臣之去就亦謂得宜竊見嶺南節度使薛王知柔近有封章懇求替罷是以臣今日敢於便殿直冒宸嚴乞免鈞衡得分節制亦誠盡寫天睠莫回既集兢憂彌增激切伏念臣之心力則未甚衰嘗學政經因叅戎事尚可遠臨海服具舉化條每推糾率之勤兼濟邦家之用謹廉無犯攻苦不私微臣所能庶幾有效實非飾

詐輒罔睿明隳膽獻書期於聽允登壇受命皆是寵光
遂之則臣必有為奪之則臣將不逮上惟君命乃獲始
終且使臣又全進退自昭聖德未爽舊章仰望鴻恩臣
某無任迫切惶恐之至


第二表

臣某言去冬以持衡力竭待罪年深曾披肺肝乞免機
務兼遇嶺南節度使知柔上書求代臣遂仰告聖慈願
守遠藩別立微效陛下未容休罷尚委弼諧旋命貴臣

密宣睿旨臣之去就詎合固違焉敢復拜封章是以苟
安廊廟又移歲序何補國家臣頃者瀝懇之時陛下亦
降許臣之旨欲俟他日知柔再有陳情則於此時允臣
所請邇來備位不敢更言上荷皇私且策駕蹇今知柔
又貢章表辭甚激切宗枝將帥事體可從亦繫機宜便
合制置速擇交代免失一方倘陛下念知柔陳乞之私
察臣披露之懇使之仗鉞委以藩條必能撫諭島夷董
集征賦旁資國用粗慰聖心躬親則可以使人廉謹則

不令生事擇利而斷全在宸衷當邦家匱乏之時敢違
輸貢兵革交侵之際幸保土疆臣與知柔各獲其所伏
惟尊號皇帝陛下恭默守位明哲臨人每務永圖以揚
丕烈克全君體尤重大臣苟非輔相之間誰能盡窺聖
德臣之遭遇獨異等倫臨事出言未嘗不信輸忠抱直
無所不知七年以來萬幾實重仍逢多難唯任至愚若
非聖明尋合顛敗由茲感激更竭筋骸近者自量力實
不逮今所陳乞未曰退休荷寵出藩臨戎報國誓秉始

終之節兼推糾率之心直寫赤誠冀開玄鑒今日延英
殿已具奏聞未蒙聽允輒陳賤翰更冒宸嚴臣某無任
祈恩待命迫切兢悸之至



文苑英華卷五百七十五